

巴塘詩鈔

庚申辛酉間余令江津適臨洮李君
元方以劍州刺史權巴邑篆江巴相
去百餘里知其治狀甚悉兩邑之民
情土風一也因取其所以爲政者師
之匪直欣得朋而已明年余奉檄赴
西藏司糧務而李君亦以甲子之春
出塞筦巴塘戍兵之餉雖相去四五

千里之遠而治兵糈馭夷人所職同
期於奉宣

聖天子懷柔荒服之德意無弗同也
今年夏余期滿得代東還道出巴塘
晤李君留兩日相與慰勞語次李君
出所爲詩草二卷皆其西來道中及
抵巴塘所作挑燈讀之風骨迥雋氣

韻沉雄而摹寫蠻荒山川景物則於
杜老行役諸詩之外別具鑪錘一似
造物者於齊州九點之外留此未經
人道之語以供詩人之洗發而囿域
中之觀者僅沾沾於一邱一壑流連
詠歎蚓竅蠅聲恐不足當軒轅道士
之一哂也憶往在渝州余與李君論

詩余舉似漁洋秋柳之作李君頗以
余爲知言而兩載江津三年羗塞治
譜有一之似否余不自知尙望李君
之明以告我也

嘉慶丙寅立秋前一日侯官愚弟林
喬蔭書巴塘行館

巴塘詩鈔

李華春撰

臨洮李苞序

弟 苟相徵校閱

發成都

隨牒向天涯馳驅從王事衛藏古佛國諸番分
種類君不勤遠畧聊存羈縻意大小胡圖克按
年貢物至近綏賴使臣遠馭憑大吏土兵兼成
卒一路紛布置余將理糧儲惟慎乃攸司聞說

今巴塘南近南詔地春風亦曾到薄遣烟花媚
學稼青稞宜學圃諸蔬備冬裘夏不葛氍毹耐
油膩牛羊乳可酪蘆酒少能醉此去殊不惡更
愜四方志祖道錦城外行役偕予季他鄉有知
心握手欲垂淚夜雨淨游塵曉雲逐輕騎經過
武侯祠肅然令人興征蠻多戰功擒縱勇且智
遐荒畏神明至今不少異前途訪古蹤有詩當
遠寄

刊落浮華獨標質幹乃有此境

新津縣渡江至楊家場宿

江水下彭門曲折經皂里一渡復一渡三渡呼
舟子是時三月初綠波漾清泚桃花飛已盡未
添桃花水渡舸無須楫雙篙刺羅綺行人利涉
川農夫舉鍤俟水淺不上堰我田將何恃栽秧
時一錯終歲呼庚癸今日天氣熱夜雨應不止
挑燈坐旅館預爲田家喜

觸處纏綿似元次山

過蒙山

昔聞蒙山名今日過其側巋然立縣西岡巒何
劣崩摺疊屏風形渲染畫圖色松杉若幢幃千
萬豎山脊精氣冲井絡岷峨同一脉分此一支
秀天半接雲液特產茗數株雀舌含嫩碧山靈
時守護世人不易得有司沐浴告撥雲始採摘
甌貯獻

彤庭殷薦表精白茲山實靈異豈止神仙宅王
事近彭彭峻嶺不遑陟邑宰延入館初見若素
識飲我貢餘茶支體頓暢適山下往來人大都

名利客此卽清涼散慾火飲能熄盧仝七碗後
清風生兩腋尙未領其妙祇獲閒中益我擬著
茶經妙義勤剖析他日入山中兼可煮白石
觸境生情詞能達意

過飛龍關

兩山窄夾路一水急衝石陡上飛龍關身高跨
雲脊巖道此屏障西望山更逼橫出幾千仞欲
阻遠游客寥落坐劍州何若事行役艱險心不
憚登臨性所適矧此黎雅境幽興日開闢瀟天

今無雨嵐翠空中滴

壯懷逸興流溢行間結更超妙

榮經道中

蟬鳴楊柳岸正是暮春時山陡農難墾水清人

易知

邑宰朱公振源居官清廉

林篁排箭竒野茗門槍旗物

產兼風土行吟當竹枝

籌口

連峯中斷處竒篠復嶙峋樹列旌旗暗山開壁壘新孤村烟漠漠淺水石粼粼險或車箱似遲

回入谷人

奇險稱題

九折坂

昔聞九折坂險絕更宵冥四時多雪雨一日錯
晦明我來值春暮淫滑嘆難登石被苔蘚裹雲
從林木生奔湍雷奮怒陰崖鬼憑凌徑危闌干
遮澗曲橋梁橫在昔漢王陽車回不敢行今通
南詔境兼達舍衛城聲教被蠻荒世途險阻平
鞅掌緣王事按日計行程

登邛崃山

才過九折坂旋登邛崃山罡風斗然至吹我欲
上天松柏少枝葉草青當暮春百鳥不肯來我
馬嘶層巔板屋幾人家輿夫稍息肩地爐燃櫓
柑圍坐人解寒下視清溪縣乃在大山間城真
如斗大一望可了然緩步下峻嶺二十有四盤
幸無頑惡石當路阻我前道傍荆棘裏有花如
杜鵑顏色何艷麗不欲受人憐行行日將落晚
炊起青烟回看下山路雲鎖白鶴關

畫不出者詩能寫之乃知詩中有畫未足爲奇

清溪縣

城壓下山龜

縣城地理家謂在下山龜形之上

溪流濬作池西

南通道路今古鎮邊陲地瘠生涯薄山深物候遲誰憐賢邑宰心力已云疲

高橋至林口

深澗寬丈餘巨梁跨左右過橋喜新霽山路便行走雪色冷來禽風意澹垂柳稍覺烟景濶又

入箐林口

淡雅

登飛越嶺

嵯峨飛越嶺人隨高鳥度努力方半里屏息才
一步縹緲登雲梯迢遞朝天路虎豹石蹲巖龍
蛇藤挂樹深山春欲盡陰厓雪猶冱松杉冷無
色谿壑慘少趣塵衣風抖擻公事日馳驚山靈
留不得人扶下山去

結句超妙

發化林坪住瀘定橋

林深反無鳥山曉猶烟霧欲早起却遲竟爲幽
谷誤遵隈徑詰曲傍崖心恐怖澗水分順逆我
行異沿沂山木罨官橋春波漲晚渡故交會面
難客館且小住

謂瀘定橋巡檢王公廷景

起四句與謝康樂猿鳴誠知曙谷幽光未顯
巖下雲方合花上露猶泣同一奇妙

宿頭道水客館

重掩象肺腑幽深寓耳目峰疑日月避山將天

地束飛瀑頻濕衣懸厓欲壓屋對面嶺雲白隨
意階草綠跋涉已半月淹留忽三宿晝夜風雷
響春睡不敢足

澗水與瀑
聲如雷雨

通體精湛

打箭鑪

孤城鎮山脚低窪如井臼一道水穿心三面嶺
開口溪流與山風終日相爭吼坡上沙常流澗
中石欲走邊陲此要隘建置已永久蠻夷雖向
化猶需強兵守西赴大荒西聚糧謀諸友夏雪

更凜冽裘宜狐貉厚丈夫四方志精神當抖擻
不待故人飲自勸一盃酒

老句紛披一結趣極

鑪城卽事

莽莽征蠻地悠悠選佛場昔年曾壁壘此日已

城隍教尙沿西域強能比北方將軍開燕寢

明正

土司甲木叅諾爾布

釋子處蜂房瓊瓏裁衣厚

誥授武顯將軍

醍醐作餌香丫頭通漢語

漢民稱蠻婦爲丫頭有爲漢民役使者頗

通漢語土目凜王章啞啞多烏烏蕭蕭祇白楊山

含風氣冷澗帶雨聲忙牛馬來叩管盞茶出益

梁當歸連遠志又入旅人囊

鑪城以西並無炮治藥物

鍛鍊精工可補風土記

出鑪城

中華極西地古蹟打箭鑪自此入大荒跋涉更

艱虞叅戎偕都闔杯酒餞闔閭

署協鎮參戎德公印都闔圖公

棠阿餞別相約三年別後會圖歡慷慨就長道人

喘馬氣麤

自打箭鑪以西令

僮僕挾弓矢相戒

遇萑苻

蠻民有要人於路而攫財物者蠻人謂之甲巴

前面大雪山入

夏猶模糊一望寒生慄逼我白頭顱
真情真景難在筆足以達之

宿折多山麓

野店三四家零落傍山麓疲馬駛人卧午雞喚
客宿夏日照山雪寒光奪人目無雲霞何來丁
丁打板屋店主同鄉人能擊秦中筑蠻語雖不
習風土已慣熟山深無猛虎可以保六畜卽此
是樂郊莫嫌近寒谷

風氣蕭寒淒然在目

早行過折多山

太白引行人行向天西畔山腰青一片鞍馬衝
烟斷厯坂遶九折攬轡增三歎大荒飛鳥外茲
嶺復天半毫無雲木秀徒然雪漫漫沙礫所積
成礪碣空凌亂嶺西夏猶冬重裘御青氍野飯
猶難得勞薪命炊爨

阿娘壩

遙臨阿娘壩地勢稍平曠麥苗長二寸春意已
云暢寨中蠻夫妻農事頗素尙相率鋤平蕪彼

此互饁餉宛然田家風雞犬籬落放祇愁霜雪
早不畏烟雨瘴閒時誦佛經間或學樵唱碣房
與碣樓遠近交相望內地長官過競看作何狀
遊人廣闊歷風俗資采訪

阿娘壩至東俄洛

才出土囊口又入冰雪窟夏日不能熱寒氣侵
肌骨岡上大營寨石壘猶崛吻傳言威信公
鍾琪於此屯勁卒

朝廷尙柔遠聲教已四達至今衛藏使歲貢貢

金佛矧茲附近蠻耕鑿安生活祇緣地氣冷開
壑未寬濶俄洛與提乳二水名二水流滑笏會入
雅龍江萬里朝滇渤

晨發東俄洛過高日山

蠻中百戶長道左偃僂狀牛羊塞前途馬來齊
相讓八角破碉樓野鳥巢其上石室烟生處幾
家相倚傍入谷杉參差青翠生意暢數日走童
山見此一神王登登高日峯絕頂恣眺望回首
東來路雪嶺反西向游子出成都行李費摒擋

至此嘆裘敝風寒思挾纊

雪嶺反西向比少陵雪嶺界天白更奇

宿卧龍石

蠻民不鑿井結廬傍水澣過客停征驂亦作東
道主初夏日晷長到來已亭午轟轟雷數聲雲
脚拖衡宇對面千仞山上雪而下雨溪草抽碧
線嶺樹翻白羽景色分濃淡高低異寒暑他日
逢雲林煩將畫圖補

卧雲石至中渡

日行煩車馬夜夢乘舟楫旅魂不安寧客思亦
厖雜平明催就道鞭絲自相接添雨新水駛戴
雪寒嶂疊路逢戍卒說兼司往來牒久愆瓜期
代邊域尙承乏三巴餘賊盜干戈未能戢戰勞
戍且逸安敢念妻妾此卒知大義兼能遵令甲
朝廷豢軍士恩厚且仰答導我以先路興梁
不勞涉行行至中渡人烟湊山峽

中間代敘戍卒語意皆從工部詩中得來

中渡旅夜

一出打箭鑪多宿澗水邊今宵聒耳甚萬馬渴
奔泉風雷渾不辨湍響徹空山板屋漏及身始
知夜雨懸還家賴旅夢高枕難安眠孤燈光熒
熒披衣理殘編

再宿中渡

松光照四壁山昏未及酉

蠶中不生菜子之屬故無油蠶人燃油松

照夜謂之松光

客悶無可遣吟餘茶代酒野店寂無人

散步道左右峽中天不大尙得見北斗萬籟都
不聞祇聞寒溪吼長途借馬騎明日能行否

至中

渡須換夫馬
因此留滯

二作具見荒涼之景

途中聞堂弟霞卿凶信

弟芬乾隆己酉拔貢由鑲黃旗教習

於嘉慶癸亥二月初七日去世見以知縣用今甲子正月

未現宰官身甘從地下人歲空逢甲子夜枉守
庚申鴈斷秦川月鵲悲蜀國春遙憐堂北草含
露淚痕新

共索長安米同爲蜀郡遊相思忽兩地一別竟
千秋枯樹杈枒立寒溪嗚咽流行囊書札在檢

閱涕難收

二首格律渾成

自中渡至麻蓋中

急急澗中水溢出道上流碎石嚙人足垂藤打
馬頭曰正峽光滿雨餘山色幽綠陰寒忘暑紅
葉夏變秋盡日無禽語溪聲入耳道道傍野牡
丹香被山蝶偷似此蠻中景宛從塵外游誰言
荒涼甚祇益旅人愁

自麻蓋中過雪山至西俄洛

昨日穿雲林今朝過雪山咫尺風土異蒼茫宇宙寬
火龍不到處夏日亦生寒凍泉依石瀉清冰作鏡看
松杉畏生嶺避風藏山灣遂令重疊嶂頭禿空巒岼
饑馬恨草短僕夫苦衣單悲歌猛虎行惆悵行路難

西俄洛晨起

寒驛無更柝夢回天已曉山窗上朝曦不聞有啼鳥
萬籟感俱息塵念已力掃起視山店外昨夜雪皓皓
四月草木變一夕天地老前山更險

阻悵然悲遠道

以上三首清寒堅瘦境愈奇而詩愈妙

夜雪

蠻中風氣異入夏雪漫漫孤燭三更靜重裘四
月寒西行通衛藏北望阻長安奔走人將老何
時卸馬鞍

悽婉感人

三宿西俄洛

客向西域去心常急如矢車輪不生角宛轉豈

能已數片東來雲前日同到此相別一兩日雲
行億萬里而我胡爲者行行又復止乘蹻果何
術還當問羽士

奇情中具有苦情

自西俄洛過日工達山至咱馬拉洞

杉翠潤客衣青不到山頂溪水互迎送走谷勢
俱猛旄牛負行糧兼馱蒙山茗登降策其後馬
足不遑騁此地近萑苻剽劫時一逞往來西域
賈弓矢交相警我非列禦寇過此亦天幸能如

李頻詩翻願豪客請

自咱馬拉洞上山又過一山至火珠克

上嶺旋下嶺身困道邊坐煮茗飲僮僕擇草秣
牛馬毳幕幾蠻戶傍溪起炊火坡頭羊三百笠
簑無人荷一徑穿白雲又被連峯鎖地寒土境
坳石亂路坎坷有時無雲雨中雹常墮人言
怪物爲經過防么麼是日天晴霽征衫游絲惹
入店主人言如此風色寡

一片神行妙入化境不可以字句論工拙也

襄塘晤李益昌明府

金頂光耀日枕山梵刹古僧徒三千人會食聽
粥鼓市肆屯百貨外地重商賈惜哉千頃地寒
不產禾黍吾宗益昌令素諳治縣譜來此籌邊
策糗糧滿倉庾渝州一見面別後想笑語絕域
今握手備述嘗險阻雲行空虛中變化不自主
茫茫大海濶崖岸在何許大荒天之涯風慘霜
雪苦治裝請從事甘心我與汝君飲塞外水已
歷兩寒暑及瓜代有期蜀雲快先覩我曳短後

衣猶沐黃梅雨征夫徒駢駢王事嘆靡鹽君克
導先路我亦能踵武他日再相逢一笑吾輩腐
雲行四語忽入比體風人遺音

裏塘至頭塘

郊原平如掌袤延百餘里入夏草方青野花點
點紫想像入山中景色亦如此豈料荒涼甚秋
草至今死嶺頭殘雪明點綴瓊瑤似塞外四五
月賴有此景耳不然不毛山更對青山恥過客
搜枯腸被誚管城子

矯天瘦硬又似山谷一派

頭塘至喇嘛了

南風滿山來勢較北風猛縱御狐貉厚亦難當
此冷巖畔百頃池湛虛涵光景風塵恐老瘦不
敢俯窺影寒驛馬色慘野戍人烟迴西隨流水
去轉入雲林境離離青稞苗高高蒼松頂疎雨
點客衣塵襟煩一整

登喇嘛了山頂見對面一山孤峯峭絕積
雪皓然巖中諸山無此特出者惜不知

其名耳

塞外千萬山危峯獨插天具此奇峭狀可惜落
百蠻上凝太始雪終古白日寒鶴駕仙能到鐵
索人難攀山靈不求知其名亦不傳僻壤有畸
士寂寞過歲年

山靈四句妙解

至二郎灣望二郎山

稅駕二郎灣仰眺二郎山四面斧削成畧如司
寇冠松杉滿谷中冰雪明雲端咫尺天路近可

望不可攀

二郎灣至立登三巴亦名熱梯

宛轉遵水曲高低傍山麓陰嶺柏不大陽坡草

全綠幕隨牛羊徙經倩風月讀

蠻人書唵嘛呢叭彌吽六字于

布幡細片上植竿懸之風起颼颼有聲云代口誦矣蠻語煩人譯蝸居借

客宿千里入已深諸酋見頗熟熱梯分界處轉

畏簡書促

熱梯係巴塘所屬

經倩句奇而雅

立登三巴至大朔

山行畏雪光靨黷不離目溪岸夏留冰馬踏碎
寒玉萬杉嵌石壁錦屏鬬藻縟天工復逞巧奇
峯紛攢簇道傍多古柳壅腫而拳曲南風吹嫩
碧亦頗丰致足憶游萬柳堂京華仰芳躅今走
蠻荒道情景忽感觸

大朔夜興同諸弟

關山又關山明月關山外我行西復西仰見太
白大今夜雲烟淨兼息天地籟寂寞蠻貊相
與停車蓋

過大朔山至小巴冲

去天才尺五登陟竟足躩女媧補青天餘石未
盡鑠黃梅時不雨六出紛紛落夏雪與冬雪新
舊爭厚薄林木蔽天日山腰路誰鑿綠雲中斷
處麴麥繡山脚此間節氣正風土亦不惡明日
三十里牛馬卸囊橐

小巴冲距巴塘三十里

小巴冲抵巴塘

激石一水奔插天兩壁對行行出谷口斗然豁
眼界雪晴柳飛花雲暖麥吐穗芳菲四月天錦

繡千頃地梵唄僧歸院交易工居肆土官最恭
順客子多流寓曰余來茲土正值望甘澍虔心
禱彼蒼晝夜雨傾注

初到巴塘中宵有感

雀散鴉棲人掩關清宵習靜一燈閒松風響起
軒楹外梅雨涼生枕席間手答雁書通衛藏身
隨龍劍落夷蠻豈知今夜閨中夢猶繞巴江與
蜀山

通體清新一結深情無限

巴塘

童山重疊繞巴塘中有田疇麥穗長四月榴花
驚火艷雙溪竹箭響雷硯木梯高下登巒寨金
頂東西闢佛堂以有易無猶古制誰居奇貨是
茶商

迢遞西通遼佛場中原聲教被蠻荒官船雲渡

竹笆籠

竹笆籠地名設塘船四隻

驛騎星飛梨樹塘

梨樹塘名設塘

兵馳遞公文

閩外熊羆屯古戍朝端龍虎鎮邊疆自

慙寥落劍州牧也到天涯司糗糧

氣象雄渾

觀刈禾

家家鎌刃喜新磨
趁老晴天共刈禾
不識堯民
擊壤意阿彌陀佛
卽農歌

蠻人刈禾時齊唱阿彌陀佛以作歌

過茶樹埡抵牛古渡而迴

南山日在眼
白雲招我來
苦爲俗事絆
無暇履
莓苔今日過
其下匆匆策
馬廻有船
不得渡
瞻望空徘徊
非關虎豹阻
豈因猿鳥猜
一行作下
吏七尺墮塵埃

起極高超

副土司送桂一枝

童子未入戶香氣已撲鼻
好花如好友迎接倒
雙屣疑從天上來肯逐秋風至
明窗與淨几此
間堪位置清姿涵沆瀣微馨陋茉莉
味外更有
味豈許凡夫嗜寂寞蠻貊邦迢遞風塵吏何意
雲外友竟不我遐棄多君亦仕宦不爲俗務累
今日芳樹下共誰酩酊醉

灌園

秋風逐雷霆返照送虹霓高山割雲雨陰晴異
東西西澗水清淺東澗水帶泥帶泥亦有濟野
老爭灌畦我有三畝園菜甲猶未齊待灌秋禾
罷餘潤分小溪

每於起筆振勢直追少陵帶泥二句接得入
化逼真古音

聽誦經聲作

僧雖日誦經功課嚴於士海螺繼晨雞催促大
衆起上殿和南罷貝葉攤短几千口同一聲宛

轉周復始儼舍與寺鄰不必常隨喜日聞梵唄
音恍悟清淨理觀詩亦不妄辨香杜子美誦詩
與誦經功課可相比燈下見蠹魚深入書卷裏
精華爾不得徒然鑽故紙

送陸秀山孝廉旋里

秀山匹馬來梁州東西兩川恣遨遊王宰善畫
巴蜀山君詩筆力與之侔十萬大劍磨天際銀
河夜洗芙蓉秋能事促迫翻見妙鐫刻直使鬼
神愁一旦束裝欲歸去五嶽丈人不能留片紙

告別飛塞外鄭重笑翹瓊瑤投君苗尙未焚筆
硯以詩代札附星郵祇愁匆匆歸去早魚入錦
水任沉浮

甲子中秋

去歲劍州看秋月今秋塞外過佳節壯懷不逐
流水去逸興偏逢良宵發東家丹桂枝連卷一
里香不到酒筵徑欲移席瓊樹下祇恐主人無
事已安眠小樓東西開高牖東望不足西回首
姮娥與我雖有約明年此夜未免相隔一年久

音節高妙想見興酣落筆

贈正土司之長子札什益錯克次子格宗

策凌

公子才情不碌碌爾翁爲爾設家塾淨几揮毫

兼削竹

番字用竹筆蘸墨書之

佛經聖經一齊讀莢稗生

恐妨五穀春月豆子得雨熟充腸羊酪日一斛

不如醍醐發性速

菜圃

青青圃中菜蟲食葉無存食葉猶自可切莫及

其根嚼得菜根香我嘗味此言嗟嗟蟲與人性
命一畝園

有古意

八月十八日憶弟芍姪振新時應鄉試畢
一望雲飛有所思還家未必肯遲遲兩行驛樹
蟬聲滿正是長安道上時

寫景而情自見真是唐音

塞外行

烏鴉食肉雀食粟嘖嘖啞啞訴不足蠻人不肯

傷飛鳥飛鳥苦多人苦少一半送入梵王家口
吹簾築身袈裟不耕不牧食於人爲爾大衆轉
法輪

塞燕行

塞外飛飛燕不識巢梁棟祇緣毳幙居難與鳥
衣共我有高樓列西東簾捲戶開梁棟空讓爾
營巢伴人宿一變舊日野處風

夢後作

持帚花前掃薄埃晚看山外夕陽開如何不願

經心事反自三更夢裏來

義山風味

枕上飛魂幻不窮
入神出鬼又仙風
世間怪怪奇奇事
也在人情物理中

寓言又似香山

巴塘晤孫少尹

少尹名廷選
管理後藏糧務
期滿旋省

一從後藏走至此
道路已足四千里
邊馬元黃奴僕勞
旅館暫且休行李
乍見似若不相識
談深前事始記得
邇來心劣固善忘
長途君復形

骸黑君言去時過丹達二月高山積深雪雪中

灰徑若滑足此地又增一菩薩今日歸來值夏

秋秋山霜霰滿征裘莽里荒村炊落葉竹巴古

渡湫寒流

莽里竹巴俱巴塘地名

此去蜀郡一月程昔託

妻子問友生上官酬庸恩意厚坐見長才得專

城屈指我當及瓜代後會應在三年內蘆酒飲

慣毋推辭娓娓且盡一夕話

雲南大理府經厯解餉至丹達山路

傍雪深數丈鞘墜其一迫而求之遂墜雪死明年雪消經厯兀坐鞘上如生蠻人以爲神立廟

祀之稱丹達菩薩

雪中二句極苦事妙在以談諧出之

暮秋枉陳明府手札

作琴

金天氣肅秋易老西方極西寒來早九月山積
八月雪捲土猛風不能埽田中粟盡鴈無糧坡
上芻衰羊難飽數點寒鴉噪古木塞外風景頗
枯槁蠻酒味逼宦情淡藏香烟逐客愁繞東望
良朋隔別久寂寞何以開懷抱陳侯手札適然
至灑灑千言猶恨少爲言蠻荒數千里層巒疊
嶂烟嵐遶氣候自與中華殊起居更宜慎昏曉

况當蕭瑟授衣節毋使霜威侵袍襖近日一事

快人心數年軍須今可了元侯赫怒率鐵騎

經畧

額勒公登保

將軍賈勇奮金爪

四川將軍德公楊泰

巴西楚北

秦終南不留餘力圖蔓草方臘楊太早授首殘

賊一一應弦倒下皋競羨秋鶻健掘地難容覓

兔狡水關無須堅壁壘山民何用修城堡佇看

庫藏于思甲不勞舟挽瑯琊稻紙長尙未讀三

過已除心中舊懊惱憶我前守劍門關騰騰妖

氛暗蜀道境內軍士大斬獲餘黨窘迫徒奔擾

承乏渝州重江防插岸旗幟兼羽葆兵忌間謀
示森嚴吏整戎行矜強矯而今歲事指顧間義
含殺氣符蒼昊遠近聞之皆忭舞保民民亦能
自保網開三面聽其逸猛獸猖狂自糾絞羽毛
勞勞鳳凰心只爲世間出妖鳥

淋漓痛快暢所欲言此坡仙得意之作

讀吳表弟小松松花菴記

松花菴先姑丈
吳沅州公之別

業公字信辰
號松花道人

松花道人已作古菊巷巷北留花塢季子詞壇

號小松不敢擅作松菊主園中挺立五大夫恍
惚月下精靈聚一花一石一禽魚父之所愛愛
如父援筆作記示無忘鄭重不啻承厥緒嗚呼
梓澤宴羣賢安仁賦詩成識語平泉花木空經
營種橘龍陽心亦苦惟此小園同寢邱已不與
人人不取約畧布置清且幽冬日烹雪夏課雨
沅州太守多隱功世當大啟爾門戶君才亦不
甘學圃此間終非處士壑

燃燈節

十月二十五日佛寺及僧衆蠻民
家家燃燈於屋上相傳是燃燈佛

誕日

身居不夜城無月亦光明
佛火傳千古禪燈覺
衆生破荒蠻貊闢燭暗
鬼神驚散漫香烟裏時
聞法鼓聲

巴塘食魚作

塞風吹水凝冰初有人釣得雙鯉魚
形超禿尾異縮項得亦不賣特獻余
羊肉酪漿不慣食作羹此地又無鮓
偶然魚鱠供一餐欲爲王餘安可得
鯉也昔號赤鯁公禁之不入盤殮中
夷人

見魚不敢取謂魚種類卽爲龍中華人來縱口
腹一竿餌及鱗六六不設網罟水族福蠻荒尙
沿古風俗

七古每以峭折矯健取勝不襲唐人窠臼

題朱明府倣唐六如白描洛神圖

八斗才成洛神賦萬古千秋推獨步丹青描寫
恐難如況以淡墨施縑素六如居士筆有神純
用白描傳其真秋菊當階矜獨秀芙蓉出水淨
纖塵轉相摹倣更超絕迥若流風迴艷雪顏色

莫令脂粉汚神光不隨烟雨滅慕主當年有至
情摘華挾藻借爲名此意貴能寫得出莫將感
甄誤平生

細意熨貼一結尤立言有體

乞人移梅

聞道山中多野梅煩君移得幾株來肯甘淡泊
邀誰賞定有因緣爲我開對酒更宜兼雪霰臨
軒不使惹塵埃此花品格能醫俗好共琅玕一
處栽

白描佳句詩中上乘

小寒

方入小寒寒氣增天時人事歲相仍砍柴驢子
怕馱雪取水魚兒驚鑿冰土礎晨炊煎乳酪琳
宮夜梵點酥燈主人餽我葡萄酒適宣撫司吹
忠札布送葡
酒閒對殘花飲一升時晉菊
尚開

新奇

五更

夜靜灘聲入耳迢極寒霜氣入衾裯連宵未續

紅爐火出塞宜裁
白氎裘萬里斷蓬飛
絕域五更殘月下
高樓夢魂才自家鄉返
又欲迎風向隴頭

高唱又是李滄溟

擁爐

邊方無事吏無憂
獨擁紅爐懶下樓
窗隙風威利於刃
簷前晷影疾如流
可憐作客遷夔府
時少陵客爲問何人坐劍州
余從事巴塘本任劍
州上憲委員攝篆
萬里烟鴻飛復下
雪泥又有爪痕留

出郊

冬至已旬餘平原地氣舒牛耕欣土潤馬踏怯
冰虛危徑通蠻寨寒林抱梵居迎人人不到歸
去且徐徐時迎四明府不至而回

大朔山麓送四明府赴成都

四十八雙流
邑宰管理察

木多糧務
期滿旋省

大朔山近天尺五游人登陟嘆辛苦西麓林木
蔭道周東麓高下不毛土憶我來當四月天雨
中銀靛撲馬羈今君東去歲云暮身披鶴氅隨

鳥渡山頭一望盡
雪山不辨成都在何處
行到華陽欲仲春
花明柳媚正芳辰
回念三年居塞外
終日茫茫對沙塵

溪竹

疎枝照水影橫斜
更傍溪橋賣酒家
踏雪尋君亦不俗
一樽何必就梅花

妙有新意

昭陵石馬歌

學使觀風題

三尺劍得天下六匹名
傳破敵馬刻石昭陵宛

如生迎風直欲騁四野
漁陽鼓角動地來大河
南北一旦起黃埃
當御驕驕盡爲祿山有沙苑
所存祇此區區之駑駘
潼關一戰大失利痛憤
誰識神靈意黃旗軍與白旗交
數百陰兵紛紛
竟突騎戰罷歸立靈宮前
汗血流溢毛仍拳大
唐社稷山河終如故
神功鬼謀兆其先
石馬兮
石馬當與掃除禍亂之郭李
同垂奇勲靈跡於
萬年

音節長短參差入妙而題事無不詳明

詠燭

一炬清輝照案頭
自煎原不自爲謀
結花專報人間喜
不學離人涕淚流

卽事

番僧於每歲十二月下旬裝西方諸變相舞蹈俗謂之跳鬼亦古儺意也

執劍逐魑魍
年年歲暮時
夜叉頻舞蹈
菩薩亦威儀
法寶珊瑚造
山精魍魎爲
紛紛善男女
歌唄不知疲

立春日

春到無先後
誰言黍谷遲
雲皆含雨意
柳欲露

風姿關塞懷人日池塘夢弟時筆端生氣出剪
綵笑參差

人日二首

人日天晴爽今年人人好眾口同一辭歡喜欲
絕倒我年過半百從事邊城堡歲餘慣風土不
愁老更老緩步出郊游山水擴懷抱麥芽欲出
土花蕾滿樹杪雖無落梅粧柳條漸裊裊有何
傷心處詩興來覺早

蘇詩人日傷心
極天時觸目新

番俗喜爲僧生齒恨不繁何當人其人綿綿生

子孫多牧牛羊馬荒地開田園上完天家租下
報父母恩熙皞享歲月恭從講貌言此乃極樂
國空門終空門

一鑄而成自然高妙前首見性情次首見經
濟

正月十日

不苦三冬雪

去冬巴塘無雪

猶占十日晴畦蔬寒未種

沙草暖先生春水迷人影和風變鳥聲重裘方
減半步履覺身輕

閒適之作

入春

入春春到否一望尙荒蕪
霞變雲輕重水綠水
有無猿思攀碧樹馬欲秣青芻
藥圃分泉灌人
工課獠奴

春寒

春色緣山斷寒雲抱日升
爐空仍舉火硯冷又
呵冰谷鳥遷猶待潭龍起
未能東西村店裏酒
價一時增

頷聯天然妙對

聞啄木聲

門可羅禽鳥人誰投漆膠偶然聞剝啄一似學
推敲樓豁峯巒入墻低樹木交錯疑遠客到書
卷暫時拋

稚極趣極非俗吏所能知

述聞

聞前藏每歲正月望日迎唐公主像儀仗音樂極其美盛

公主乘車駕幢幡到處迎寶衣千劫化玉鏡一
方明箴策蠻中樂琵琶馬上聲陋他青塚草空

見歲枯榮

鄭觀察靜山先生新春頒寄醃菜椒醬諸品

空自酌屠蘇春盤生菜無遠音傳驛使清味付
山厨菘韭誇高士鹽梅望腐儒勝他承露薤裁
句比青芻

清雅切題

德陽彭香谷明府解銀赴西藏途次巴塘
詩以送之

塞外逢良友，渾忘久別離。
酒酣紅見面，吟苦白生髭。
王事供奔走，邊防待度支。
阿咸能耐苦，相伴到天涯。

此地通西藏，悠悠道路遙。
春風雖已到，冬雪未全消。
入水龍猶蟄，登山馬不驕。
餘寒何料峭，且莫解狐貂。

真摯

野雀

野曠炊烟少，山深積雪多。
春田方播種，謀食近

如何廡下頻舂米門前不設羅粒紅拋滿地薄
暮一相過

副土司園中看花留飲

田間小徑斜不速到君家甕啟三年酒軒臨一
樹花主人惟簡默坐客自喧譁贏得青衣醉酡
顏映晚霞

意興蕭疎詩則妙入化境

野園

無人踏莎草有客闢柴門喋喋禽爭樹狺狺犬

守園野雲停徑暗溪水落坡喧誰聚生公石頭
頭可與言

靜觀未半日稍稍慰詩魂信有鶯遷木誰言鶴
在樊短牆山入座獨木水環村文杏如招我重
來載酒罇

夜

邊塞不聞更寥寥洪化城

洪化城中盡爲番僧所居糧台附焉

星

垂天有色風吼水無聲僧定任喧寂客來增送
迎明朝騎款段權作踏春行

治圃

及肩墻累石出口水分畦臺畔留餘地花間闢
小蹊鋤從隣舍借事與小人齊採擷當春夏風
光羨灑西

瓶中杏花

未向花村去雙枝折得來將毋憐遠客以此作
良媒泥已沾飛絮爐寧然死灰晴窗暫相對只
好撥春醅

一氣渾成有_三神無跡

晤梁明府

生桂夾江令管理拉
里糧務期滿回任

報最三年滿登途兩月餘何時別大府幾夜宿
穹廬水鑒鬚眉古月窺囊橐虛萊蕪重到日依
舊釜生魚

咏桃杏

夭桃與文杏顏色恰相當共入潘安縣同登宋
玉墻春風無厚薄月旦莫低昂兩美邢兼尹合
之寧兩傷

客心

悠悠客子心遇物動成吟句莫論工拙情原有
淺深望鴻青嶂外繫馬綠楊陰閒踏王孫草低
徊不自禁

古來真正詩人惟白香山有此興趣

桃花

山失焉支婦女愁此花還逞舊風流宜栽仙子
吹笙院莫近倡家賣酒樓恐妬冶容惟斂笑欲
通隱念却含羞東風一去無消息結得木桃何
處投

深情若揭好句似仙

巴塘桃花淡紅色似杏而瓣稍大不類中國種而中國種亦間有之土人謂之漢桃

東風隊裏施粧薄竹外溪邊意態閒一自昭君來絕漠焉支婦女失紅顏

鴛鴦桃花

淡紅與深紅花色相間故名

脂粉催粧尙未勻此間誰是畫眉人鴛鴦花下
銜杯坐相對無言度仲春

情在言外

屋上

野屋礙人眼言登屋上頭最憐臨水岸權作看
花樓日映桃緋麗風飄柳帶柔誰言邊塞陋文
物仿神州

細膩

花朝同弟獻夫北堂郊遊

探得村桃正綴英鴈行天畔寄芳情看花莫擬
梅花賦風格終輸宋廣平

皮襲美感廣平之所作復爲桃花賦

花下銜盃柳下行春禽尙惜少流鶯土人言語
渾難辨當作縣蠻樹上聲

每有新意未經人道

偶見

春懷全付與春風日向郊原覓艷紅忘却小桃
園裏笑等閒寂寞倚墻東

胡燕

營巢巖穴裏歲歲在家鄉不解春秋社何勞來
去忙塞垣青草短野岸紫泥香恥作依人計羈

栖玳瑁梁

看村花

羊裘侵曉怯春寒
子夏何妨戴小冠
難得狂飈不作惡
村花半日倚牆看

望山栢

勁柏春來尙舊容
數株共占一高峯
雲穿煙鎖無人顧
岸柳溪桃色正濃

寄托遙深

梨花

一色後於桃李開
洗粧人鬪竹根盃
風前記得曾相見
一片春雲夢裏來

穠短纖長總不宜
對花休咏女郎詩
風流才調香山老
萬樹清香雪滿枝

二首情韻絕佳

春日懷吳小松

自入西川契濶深
况聽羌笛與胡琴
參軍雖學蠻人語
羈宦寧忘越客吟
作雪才情輸塞柳
鳴春聲調遜山禽
知君近日追韓筆
篋內應多謫

墓金

遠道

遠道思家游子情
况逢令節是清明
無慘正值
桃花落有恨
偏聞杜宇鳴
望眼時飛雲一片吟
鬢漸染雪千莖
東風亦屬人間客
年來迭
送迎

情景交融格調似許丁卯一結尤爲超逸

菜花

顏色千百般
芳菲鬪草木
春華秋有實
實終遯

五穀原野黃一片藻彩何繁縟亦是嘉禾種土
不擇瘠沃正色表中央迷離映朝旭直訝天雨
金絕勝地種玉長安尙牡丹開時車接轂甚至
貴梅柳反將賤菽粟焉得一頃地種菜菜連屋
朝看花露滿暮看花雨足清風一灑灑結實收
千斛易米充晨炊取油資夜讀元亮田家詩吟
咏兼及菊菜花卽景句何嫌格調俗

大風

萬弩射蛟鯨波翻浪不平東風何激烈春令過

巴塘詩鈔

卷上

三

清明不促潛龍起空煩宿鳥驚
裴優霧易散李靖雨難行
古塞牛羊卧邊方草木萌
速宜鞭大石應候轉陰晴

一起雄壯

副土司折贈牡丹數枝

萬里洛陽花誰人移絕域
搖曳春風裏脂粉淡粧飾
地主煩折贈瓶水彌護惜
無言兩相喻同是天涯客

三月十九日雨

驚聾止有一聲霆靄靄湘簾晝欲暝塞外山頭
春又白雨中柳眼晚彌青不須奔走鞭陰石猶
以滂沱禱畢星今夜更聞簷溜滴雷同亦擬喜
名亭

晚眺東山

衆阜擁高岑松杉色鬱森春雲和雪冷暮雨入
山深屈曲來時路蒼茫此日心塞垣通隴坂一
紙竟浮沉

暮雨句耐人尋味

山雪

春雪滿峯巒樓中挂笏看日光驚閃爍風力費
雕刊未使聰明淨空教氣象寒邊荒三月盡尙
覺卸裘難

樓上

西原春晚晚北斗夜闌干塞上胸襟豁樓頭眼
界寬雲屯風谷薄月過雪山寒衛藏今安穩軍
中有范韓

大有少陵風味

副土司園中賞白芍藥

獨尙西方色開爲西域花容顏雖素淡氣象反
豪奢飛雪鍊三日沉香焚數車獻宜珍卞玉割
不費胡沙淨傍瑤階種迷因粉壁遮素心相對
久翻羨雨無瑕

格調又近玉溪

異方

榴花如火柳如綿隴上瀾翻小麥天殺甃卧殘
千帳雨鴟鳩啼散一林煙浪花滾滾將侵岸山

草青青欲到巔憶得塵衣來抖擻異方風味已
經年

志和音雅格調猶在中唐

端午日有客備酒肴郊游余亦有是舉遂
相會於副土官射圃中

覆座清陰滿環牆碧水通暑消三雅後愠解五
絃中絲結合歡索襟披如意風杯盤聚一處誰
是主人翁

飲酒任從容何妨日下春挽弓思札柳點筆擬

哦松艾葉門懸虎蘭舟水門龍故園多勝友踏
草喜相逢

灌園

引泉人白晝分水我黃昏稍減炎歊氣能添雨
露恩印星光的灤漱石響潺湲宛似塘三畝青
荷葉亂翻

清涼世界方便法門

夏日賞麗春花

春花難爭勝遲遲麗於夏得時故恬退撥藻能

蘊藉萼嬌和露綻莖弱因風亞繞叢最宜蝶含
香却厭麝雅依芍藥欄清近薔薇架艷妻更少
好仙女何姪姪葵藿甘與親桃李肯隨嫁炎日
照不畏世人知反怕粟教兄弟容鳳合姊妹迂
少陵江頭咏千古增聲價

格高氣老憂憂生新

以葫蘆爲花瓶

如膽瓶難得葫蘆倩爾爲腹圓能受水腰細可
纏絲挂壁添家具無花插果枝隣僧儻來借汲

澗勝軍持

題最雅而詩亦新奇

六月六日赴龍王塘納涼

約伴過野橋溪邊趁幽事
點點白楊花依依青草地
湍激驚雷霆石蹲駭鼯鼠
傍有泉一泓大樹久蔭庇
前因禱雨切率衆徒步至
三日降甘霖萬民紓愁思
是處龍宮通何人燕脯寄
重來倍虔肅相與詫靈異
昔人避暑飲今日臨流醉
蟬蛻發新聲蠅來嘗異味
脫鈎魚有神卸鞍馬

如意西日射食單南風醒酒氣子季興未盡謂弟
夫猶作彈碁戲竚立望小洲霜衣一鶴跂

園中種葵甚多戲爲絕句

雙扉隣戶小五品歎官卑旌節紛無數何由到
綠墀

牛羊氣味羶肉食非所好昔笑葵與藿今被葵

藿笑古詩無以食肉
資取笑葵與藿

巴塘詩鈔卷上